

# 1 THESSALONIANS

*Paul'o hesi ariböviohu'o jabuhu Thessalonica amore raromarue ekaresia jakesi örire jejëmijare jöhoje.*

<sup>1</sup> O as'e Thessalonica ekaresiaho Paul naro Silvanus-ro Timothy-ro ave jöho bamëhö. Jemë God Vavu hesi o Bada Iesu Keriso-are ekaresiaëro jëvë'ëro Thessalonica amore raromarujoho noro jemesi örire jejëmijö. No nague God-ro huë baeromo ajëmijego maro raromo'irarijego.

*Thessalonica ekaresia ariböviehu biririvoromo God mae uehorovoromo raromare jöhoje.*

<sup>2</sup> No God-are örire jö atë'iroho no jemë ae aho'obëhe uehorovoromo jemesi jöëni majae ëhi God huë mae uavarueje. <sup>3</sup> Nosi Vavue God-are örire ëninamijë'iroho noro ave jöho uehorovarueje. Jemëro Keriso mae uehorovoromo ëhuro mu maho vaejarujeje. O ae gö huë baejëvoromo ëhuro i'u'e muoho vaejarujeje. O biririvoromo nosi Bada Iesu Keriso ga'i muebemu muebejarujeje. <sup>4</sup> Nasi ö mueno'e noro garomo uvarueje: God-ro hesi dë vövöbajo'o uhohu'o jemë rajëhijaje höjo. Rajëhijajoho hesinö jëvoröhego uvë'ëro ëhu'ëro huro jemë baejëvade höjo. <sup>5</sup> Noehu ëhi uvarue hesi bëhoho urimë'i noehu Keriso-are jö ma majëhijarevare evare no bogo ma-jö'ëremuoho ë jö maho majëhijareje. A'i no God-are darugohu'o Aru'ahohu'o baejë'ëro ëhu'ëro biririvavuamu jöho majëhijamu

ma-burëro ejahuarijeje. Noehu jemesirire raromoromo jemesi jöëni diehi jië'e mu vaejaroho iae jemë gavaruje. <sup>6</sup> Röhu no'o Bada'lo noehu raromo jijiharëhi jemë'o ëhi gemuoho raromo jijihonövariyeje. O noehu Keriso-are jö majëhijarevare jemë gavariyeje huë vavaene jemesi örire rovamu. Röhu God-are Aru'ahohuro jemesi dë vövöbajo'oho avohëhamu jemëro nimorohoromo jöho biririvoromo ejahuarijeje. <sup>7</sup> Nimorohoromo jöho mae ejahuamu Macedonia sa'are Achaia sa'are raromarue Christian aribövie aho'obëhe jemesi mu ma hesi jöho heromo uvoruomë'eje: Ë'ego no'o ëhi jië'e muoho vaejarëjo. <sup>8</sup> Ëhesi bëhoho jemëro mu mae vaejë'ëro ëhu'ëro Badare jöho jemesirire jioromo jemesi sa'ae Macedonia rumorovoromo sa'a göho Achaia rumorovobe va'ë'eje. Röhu gö'o jemëhu God mae uehorovaruje jöho sa'ae dinö'e dinö'e rumorovobe va'ë'eje. Rumorovobe va'amu ae he barëjë'ego no bogo röhu maho aho majëhiromo uë'ejo: Thessalonica amo rajohuro God mae uehorovoruomaje höjo. No bogo ëhioho uë'ejo. <sup>9</sup> Ëhesi bëhoho jaburo mami'e hejë'ëro jabesi ri'öromosi jöho ae majëhiromo uëruomajeje: Paul-mëhu Thessalonica amore aevoromo va'arevare ë amo rajohuro jabesi örire mabëhe rajëhiromo baejëvare höjo. Baejëvoromo sareri'e darugo rumo'e inömo masije hörömo ëhemu uehorovoruomadoho vuonugoli God darugo'e hijaje a ma hesi muoho aevoromo vaeruomade höjo. <sup>10</sup> Aevoromo God-are muoho vaeromo hesi Harihoho muebejare höjo huro

ö'idöre jioromo rueröhego. Harihoho iae Iesuoje. Guomamu God-ro ajamamu ri'öjadeje. Ri'öjë'ëro huro no ajamuijajeje ehuro vörö'e maja rovë'o ho God bogo dëho vörönimoromo i'uoho mana bojamuijago bae'i a'i mae raromo'iröhego.

## 2

*Paul-hu Thessalonica hiromo diehi mu vaejade jöhoje.*

<sup>1</sup> Röhu nasi ö mueno'e jemë'o gavaruje bogo noro ö'oromo Keriso-are jöho majëhijamu ë muoho sisërëjadeje. <sup>2</sup> Urimë'i noehu jemesirire bogo ö'i Philippi amore raromarevare evare ë amo rajohuro huë vavaene bojamuiromomo mu sisë vaejavuareje. Ehi ë'aroho jemë iae hejë'e jëve. Ehi'amu noro jemesirire ö'amu jemesi amo rajohuro nosi jöho bijönimoromo ri'öromomo no'o muorovo'ië'areje. Muorovo'ia'amu röhu nosi Böröme God-ro ajamuijamu no bogo vuonugo'i biririvoromo hesi jö maho jemë majëhijareje. <sup>3</sup> Ehesi bëhoho aehu simano huotorovojöro mu jö majëhijë'o ho no bogo simanoho garaeromo sareri'e jöho mae hörömo jöho majëhijarueje. No bogo uehoro sisëho baeromo jöho majëhijarueje. No bogo aho sarerëmi'i nimoromo jöho majëhijarueje. <sup>4</sup> A'i God-are jöho mae majëhijarueje. Ehesi bëhoho God-ro no göromomo uvadeje: No eni javuajë uvoromo hesi jö maho nosi örire bojamuadeje noro majëhiröhego. Hesi jöho bojamuijë'ëro ehuni noro jöho avoho majëhijarueje bogo aho heromo nimoroho'i a'i God nosi dë vövöbajo'o

gövuajohuro nimorohojöro. <sup>5</sup> Noehu jemë bogo mae bogo sanusanuëmiromo sareri sareri'e jö majëhijaroho jemë iae gavarujeje. No bogo nosi sinohemuoho uehorovoromo bövioho bise'oho bojamuijöro nimoromo jöho majëhijareje. God-ro gö'ego no jö mae uëvö. <sup>6</sup> No bogo ma-aëro rajahuijöro bogo ëhunioho jemë jöho majëhijareje bogo jemëro o a ioro'iorëro rajahuijöro. <sup>7</sup> No Keriso-are apostle ömo'ömohuro javuë'ëro hesi darugoho baejë'e javue. Hesi darugoho baejë'e javuë'ëro ëhu'ëro no masije riravoromo i'u'e muoho jemë bojëmi'ibejo iae mae jio'ibejo. Röhu no bogo ëhioho ë'i a'i noro jemë'o raromoromo ma-sanu'e jöhemu majëhijareje. Vëmehu aboji harihu'o sanuëmiromo muebejaruëhi noro ëhi jemesi örire ma-sanu'e jöhemu majëhiromo muebejëvareje. <sup>8</sup> No jemëni vavaenaguo avohë'ëro ëhuni no uvareje: No bogo ma-God-are jö mahemu bojëmi'i nosi dë vövöbajo'o uhu'o bojëmi'ëjarëjo rabëni noro jemesi örire dë vövöbajo'e aho'o rajëhijë'ëro javuë'ëro. <sup>9</sup> Nasi ö mueno'e noehu jemë'o raromoromo i'u'e mu bogo bise'o vadu'o vaejaroho iae jemë'o uehorovarujeje. Noehu God-are jö ma majëhijarevaroho no bogo ëhemuoho ë'i sisone vahie majae nosi övëro biririvoromo i'u'e mue vaemu vaebe va'oromo ëhuro nosi manaho bihororomo iruno'oho bövioho bise'oho imonövareje. No God-are jö ma majëhiromo böviëni bise'ëni mana ëninëmijë'oho no bijönaguadeje jemë anojëmijöëni. Ëhuni ëhi ë'areje.

<sup>10</sup> Jemë'o God'o iae gavë'e jëve Keriso mae

uehorovaruje aribövi jemesi örire noro diehi jië'e muoho vaejövamu. Noro God-are jöhemu uehorovoromo mu maemu vaejövamu ehuro jö sisëho bogojio'li jö maemu jiadeje. <sup>11</sup> Vavuehu hesi aboji harihu'o mu öri röjëhijajëhi noehu jemë ae gemu gemu ëhi röjëhijaroho ehuro'lo gavarujeje. <sup>12</sup> Noro jemë sanuëmijë'li jögore mëmijë'li jemesi uehoroho biririvëhojoro uënövareje Godhu nimajëhi jemëro ëhi raromo jijihö'irarijego. Ehi uënövareje. Ehesi bëhoho God-ro uëvajeje jemëro hesi öri ari'ere iojiomoromo hesi aji mare raromo'irarijego. Ehuni ë'areje.

<sup>13</sup> Röhu noro ave jöhu'lo uehorovoromo vae majae God-are örire rajahijarueje. Noehu God-are jö bö'oromo majëhijamu hejarijevare jemë heromo uvarijeje: Ejöho bogo ma-a jöehu jio'li God-are jöe hö uvoromo ejaharijeje. Iae mae uvarijeje. Iae God-are jöjeje. Hesi jöhuro jemë biririvëvego ehuro hesi örire mae uehorovaruje aribövioho mae jëvajeje. <sup>14</sup> Nasi ö mueno'e God-are ekaresiae Iesu Keriso-are ariböviehu Judea raromoromo vavaeni baejarëhi jemë'lo ëhi huë vavaene baejë'e jëve. Jew rajehu jabesi örire ë'arëhi jemesi sa'a rajohuro ëhi sisë vaejëvo'li arijë'ejö. <sup>15</sup> Jew rajohuro ëhi jabesi sa'a rajo ekaresi-aho sisë vaejëvareje röhu ë hesi urimo jabesi hijo miono'ohuro jö God-aro baeromo majëhinövare aribövioho muo'amobe ruejuvo evare ë Jew rajo ariböviohuro Bada Iesu'lo anareje. Bada Iesu anoromo no raro'vö'öjavuareje. Jaburo God-are örire huë sisë bojamiromu nu huë'e muoho ae aho'obëhe nosi örire vaejarueje. <sup>16</sup> Nu

huë'e muoho vaeromo nosi öroho tugoho'ië'areje ëhuro no bogo sa'a ioro'ioro rajoho Keriso-are jöho majëhijego bogo ejahoromo maroho va'oruomoröhego. Ëhi jië'e mu sisëmu vaebe rovaroho jaruvoho börömo bëhe jio'ego iae barë'i God-ro dë vörönimë'ëro i'ue mana bojëmi'ië'e.

*Paul-hu Thessalonica ekaresia röhu maho va'o gë'i nimade jöhoje.*

<sup>17</sup> Nasi ö mueno'e röhu vaevë'e no jemë'o raromoromo dirö'ö göre rovaroho vëmu vavu'o rumo'e va'ëne majae bunemu hesi uhure ëhi javuanovadeje. Iae nosi uehoroho jemë'o jiadeje röhu no jemesi nu ano'o'oho bogo gëvareje. Bogo gëvë'ëro jemëni sisë maro vavaenaguamu öre nahareje ö'oromo jemesi nu ano'o'oho gë'irovo. Ëhuremu uehorovareje. <sup>18</sup> No ö'i naguamu Paul naro öre naho'i hi'ego Satan-ro nosi öroho tugohahuo'ego ö'oröhoho bogo eni javuonövadeje. <sup>19</sup> Nosi Bada Iesu rovamu hesi nunire riravë'o'oho no rahumesi jöho uehorovoromo dë sasohoromo nimorohë'i uvo'ejo: No ë aribövioho mae ajëmiromo ruahö'öjë'e javuajëjo. No bogo a ioro'ioro jabesi jöhemuoho uehorovo'i jemesi jöhuni ëhu'o nimoroho'ejo. <sup>20</sup> Iae maeje. Jemë mae jëvo'iramu gëgorovo jemesi jöëni nosi ihoho döro ri'ö'iramu nimorohoromo God mabëhe ua'ejo. Iae ëhuni ö'oromo gë'i naguadeje.

### 3

<sup>1</sup> Ö'oromo gë'i naguamu bogo jemë'o'oho gemuoroho rarojuvo bogo eni javuamu

noro Silas-mu niö'iro uvareje: Ë'ego nosi sivue Athens amore ari'i <sup>2</sup> Timothy nugö'öjogo huro va'oromo Thessalonica amo rajoho gëromo jöho heromo ro majahuego heröhe höjo. Timothy hu nosi Christian öero jië'ero no'o bimuvoromo God-are muoho vaeromo Keriso-are jö maho majëhibe juvaje jië'ego ëhuni noro Timothy nugö'öjareje ö'oromo jemë ajëmego jemëro birivoromo Keriso avo'avoho uehorovo'irarijogo. <sup>3</sup> Jemëhu Keriso uehorovarujohuni jemesi örire huë vavaene rovego mae uehorovarujoho vuonugojöëni ëhuni Timothy nugö'öjareje. Röhu Christian aribövi noehu huë vavaeni bae'iröhoho God-ro bamahuadeje. Jemë ë jöho iae gavarujeje. <sup>4</sup> Ëhesi bëhoho urimë'i noehu jemë'o raromarevare noro uëvareje: Aëro sisë vaejavuo'iramu huë vavaene bae'ejarëjo. Noehu uëvarëhi iae ëhi jië'e huë vavaenoho rovamu gavë'e jëve. <sup>5</sup> Röhu jemesi jöho bogo hejë'e ëma hibe rovodoho hejode bogo eni jevamu hegorovo ëhuni Timothy jemesirire nugö'öjodeje jemëhu diehi diehi Keriso mae uehorovaruje jöho he'iro. Ëhesi bëhoho na juhuonivoromo uvodeje: Nani evaho Satan-ro jemesi dëho bijioho gëvamu rireromëvë'e höjo. Ëhu'ëro noehu vaejare muoho aho'o sisërë'amo'ajëjo. O diehi jio'amo'ajëjo. Ëhuni Timothy nugö'öjamu jemesiroho ö'adeje.

<sup>6</sup> Timothy nugö'öjamu ö'ë'ero röhu aviavejë'e jemesi jö maho baeromo vuonorö'ö rueromo uövuadeje: Iae jemë Keriso mae uehorovoromo huë baerovaruje höjo. O

jemëro no uehorovavuoromo noehu jemë gë'i vavaenimaruehi jemë'o ëhi no gö'i vavaenimaruje höjo. <sup>7</sup> Nasi ö mueno'e no huë vavaene uehore gö gö hesi uhure raromamu u'uvavuë'iro hejare jemëhu Keriso mae uehorovaruje jöho Timothy-ro barovamu heromo jemesi jöëni nosi dë vövöbajo'o ho biririvahuadeje. <sup>8</sup> Ëhesi bëhoho avevejö'o ho jemëhu biririvoromo Bada'o gemuore raromarujohuro ëhuro no ma-mae raromarueje. <sup>9</sup> Iae no nosi Böröme God-are nuniro javuoromo jemesi jöëni sisë maro nimorohavue. Ëhi jië'o ho no rabu jöe majahiro mo hesi öriro ho rajahi'ejo. <sup>10</sup> Vahie majae jene noro hesi örire biririvoromo ua'i arijarueje huro ajamuijogo ö'oromo jemesi nu ano'o ho garomo jemëhu Keriso mae uehorovarujoho bisemu bogo eni jëvego ajëmi'iröhëni.

<sup>11</sup> Röhu no nague nosi Vavue God'o nosi Bada Iesu'o nosi öroho avohahuego maro ö'iröhëni. <sup>12</sup> No nague Badaro ajëmego jemë ae göëro gö avoho rajahirovobe a ioro'iorohu'o avoho rajahuibe va'oromo ijonö ma-mabëhe jëvoröhego. Noehu dë vövöbajo'e aho'o jemë rajëhijaruëhi jemë'o ëhi ë'irarijogo. <sup>13</sup> Ëhi ë'ë'o ho Badaro ajëmi'iramu jemë biririvobe va'ojuvo hujeji nosi Bada Iesuro hesi aribövie aho'obëhe nosi gemuore rue'iramu evare jemëro nosi Vavue God-are nunire ma-mae riravo'aruje. Mae riravo'iramu jö sisë bogojëvo'i hesi aribövi maemu jëvo'ë'e.



## 4

*God-hu nimaje mu hesi jöhoje.*

<sup>1</sup> Nasi ö mueno'e röhu jö göho Bada Iesuare ihore jajivo'ejo. Avo'avoho raromo jijihö'irarije jöhoje. Jöho bogo bise'o vadu'ohoje. Jemë ëho garomo avo'avoho uehorovore. Mami'e jemë hejarijeje noro uëvavamu: Ëhi ëhi avoho raromo jijihorego God-ro gëromo nimoroho'irajo. Ëhi jië'e jöho hejë'ëro jemë iae ejahuarujeje. Röhu no nague jemë gö'o gö'o döre avoho ejahuobe va'irarijego. <sup>2</sup> Noehu jögore rabe rabe Bada Iesuare ihore majëhijamu hejarijoho jemë iae eni gavarujeje. <sup>3</sup> God hu aviëhi jië'e muoho nime. Hu nime jemë öehu jijihanovo'irarije muoho bogo vae'i mu maemu vaenövo'irarijego. <sup>4</sup> Jemë ae gemu gemu aho'obëhe magonaho masu'ië'iroho mu maemu uehorovoromo dë vövöbajo'ohu'o rajahiro mo masuromo ëhi gemuoro raromore. Ëhi jië'e muoho avo'avoho gare. <sup>5</sup> Nadi Christian rumo'e God bogo gavarue ariböviehu ë'aruëhioho ë'anovoromo ma-sino hesi ganiganiohonioho magonahoho masure. <sup>6</sup> O jasi öho nadi sareramiro mo vajiohuvoromo hesi vaboroho baene. Ëhi jië'e mu vaejarue aribövioho Badaro i'ue mana bojëmi'ë'e. Ëjöho mami'e darugo'o majëhijamu hejarijeje. <sup>7</sup> God-ro no hesinö rinaguadeje bogo ehuro no öero jijihanovo'i a'i mu mahemu vaenövo'iröhego. <sup>8</sup> Ehuni ae rahu ëhi jië'e jögoru dejonö bu'öromo öehu jijihanovë'oho ëhi jië'e aribövioho jabu bogo aho no bijönaquo'i a'i God bijönimoruomajeje. Röhu God-ro hesi Aru'ahehu mu maemu

barovajoho suvuoramuijajeje. Aru'ahuhu mu maemu barovajoho suvuoramuij'e'ero ehuni no ehi gemuoho mu maemu vaebe jijih'o'ejo.

<sup>9</sup> Röhu jemesi Christian ö mueno'o rajahirovo'irarije muoho God-hu mami'e röjehijadoho no rabëni röhu maho sionoho röjehi'ejo. <sup>10</sup> Christian ö mueno'e aho'obëhe Macedonia jemesi sa'a börömore raromaruoho jabesi örire jemëro iae huë baejëvoromo rajehijarujeje. Röhu nasi ö mueno'e noro uëvö jemëro ehi jië'e muoho gö'o gö'o döre avoho vaebe va'irarijejo.

<sup>11</sup> Röhu jemesi ma-jörume raromoromo jemesi muohuremu vaere. Noehu uëvarëhi jemëro ehi'oromo jemesi övëro birivoromo bövioho bise'oho baere. Ehi jië'e muohuremu avoho uehorovore. <sup>12</sup> Ehi ë'ë'oho ehuro God bogo ma uehorovarue ariböviohuro jemë gëromo mae uehorovëvo'i jemë bövie bise'e eni jëvo'ë'e.

*Iesuhu sa'are vuonorö'ö rueröhe jö noehu uehorovego huë vavaeni u'uhahuoröhe jöhoje.*

<sup>13</sup> Röhu nasi ö mueno'e jö göho no nague vuovë'e aribövioho diehi jioruomajoho jemë ga'irarijejo ehuro bogo vavaenëgoröhego. Hesi a ioro'iorohuro uehorovoromo uvarueje: No vuovoromo bogo ri'ö'i ma-ioro'ioremu vuovo'ejarëromo sisë maro vavaenimarueje. Jabuhu vavaenimaruehioho jemë bogo ehioho vavaenëgoröhego ehuni ave jöho jajivo'ië'ö. <sup>14</sup> Noro mae uehorovoromo uvarueje: Iesu guomoromo röhu i'ovoromo ri'öjade höjo.

Ëhi uvaruohuni ëhuni uvo'ejo: Iesu mae uehorovoromo vuovë'e aribövioho jabu'o God-ro i'ovëvoromo Iesu'o gemu mae sÿjëvo rue'a'ajëjo.

<sup>15</sup> Ëhesi bëhoho ave jÿho Badahu rÿjahuijade jÿho no jajivo'ie'ö. Bada sa'are rovë'iroho ave sa'are raromarue aribövioho noro vuovë'e aribövioho bogo iosirëmiromo maroho jio'i a'i jabumëro urimo ri'öruomo'ë'e. <sup>16</sup> Ëhesi bëhoho aëro heruomo'ë'e jÿe bojëmiromo darugo'o uvavo'iramu anera bÿrÿmohuro uvavo'iramu God-are hëgÿho huavo'iramu. Ëho he'iramu gavë'i evare Badaro ö'idöre jioromo ruvebi'ë'e. Ruvebi'iramu Keriso-are aribövie vuovëvadoho urimo ri'öruomo'ë'e. <sup>17</sup> Ri'ö'iramu röhu ijonö bogo vuovë'e ave sa'are raromaruoho God-ro no jabu'o gemu mae suehu'o ma-burëro baejavuo ajiomoromo gagovavuo'ë'e noro Bada birohøjÿro. Ëhi'onugoromo ioro'iore gemu Bada'o gemu mae raromo'ejo. <sup>18</sup> Ëhi javuo'ie'e jiaje ëhuni ë jÿho majahirovorego jemesi dë vÿvÿbajo'oho mae jëvo'iro.

## 5

*Badahu rueröhego noehu avoho mueberovo'iröhe jÿhoje.*

<sup>1-2</sup> Röhu nasi ö mueno'e Bada Iesu divare rovego mu masije gö gö divare rue'iröhe ë hesi jÿho no bogo jajivo'ejo jemë mami'e hejë'ego. Mami'e hejë'ëro ëhu'ëro iae garomo uvarujeje: Badare majaho vajiohu'e aehu vahi'e rovajëhi ëhi ma-majioho rue'a'ajëjo. <sup>3</sup> Keriso bogo ma uehorovarue ariböviohuro uvoruomo'iramu:

Jaruvoho muorovoho bövioho bise'oho bogojio'i ma-mae raromaruë uvo'iramu evare God-are i'uohuro ma-majioho rueromo ë aribövioho ijumëvo'ë'e. Dë'e magonahehu ma-majioho hara'uaruëhi ë aribövioho ëhi ma-majioho ijumëvo'iramu aho bogo huruomö'ë'ö. <sup>4</sup> Röhu nasi ö mueno'e jemë bogo ëhioho jëve. Jemë bogo ramoramoro roramarujeje. Ramoramoro raromö'ibejarije jemë ga'ibejarije ë majaho vajiohunö'e ma-majioho rovego tiö'ibejarije. Röhu jemë bogo ëhioho jëve. <sup>5</sup> A'i jemë ae aho'obëhe aji'e majare raromaruje aribövioho jëve. No bogo vahi'e ramoramoro raromaruje aribövioho javue. <sup>6</sup> Èhuni a ioro'iohehu mamomorö'öjaruëhioho no bogo ëhioho mamomorö'ö'i a'i nune jioromo simanoho avoho uehorovo'ejo. <sup>7</sup> Aehu momorö'öjë'iroho vahi'e momorö'öruomajeje. Vörö'e jovo ue'ahamu simano sisërëjävë'oho ëhi jjië'oho vahi'e ë'oruomajeje. <sup>8</sup> Vahi'e ëhi ë'oruomajeje röhu no maja'ere raromaruje aribövioho javuë'ego ëhuni nosi simanoho avoho uehorovoromo muoho avoho vaeromo ëhuro biririvoromo riravo'ejo. Muorovo majare biririvoromo riravo'ie'iroho biriri'e niögoho vinebinö io'amoruomajeje bijo vösöho ë namiromo sugigivego biririvoromo riravo'iröhëro. Keriso-are aribövioho ëhi biririvoromo riravo'ie'iroho noro Keriso mae uehorovoromo a ioro'iohehu dë vövöbajo'ëro rajëhi'ejo ëhuro biririvoromo riravo'iröhëro. O muorovo majare aehu biriri'e bosö simanore io'amoromo biririvaruëhi noehu ëhi biririvo'ie'iroho uvo'ejo: Ijonö God-ro

baejavuoromo no maro bamavuo'ajë uvè'le raromo'ejo èhuro biririvavuoröhego. <sup>9</sup> God-ro hesinö baejavuadeje bogo nosi sisèhuni i'ue bojamui'iröhëro. Hu bogo èhunioho baejavuadeje. A'i huro no baejavuadeje nosi Bada Iesu Kerisoro nosi sisèho ajamuij'ëro maro bamavuo'iröhëro. <sup>10</sup> Huro nosi sisèho ajamui'i noni guomadeje èhuro ave sa'are biririvoromo raromè'o'ho o vuovavuè'o'ho no hu'o gemuoro rarom'i'iröhëgo. <sup>11</sup> Èhuni ajamirovoromo jö mae majahirovarujëhi èhi è'orego èhuro avoho biririvëvoromo mae jëvobe va'iro.

*Paul-hu ijo tugoho'i jajivade jöhoje.*

<sup>12</sup> Röhu nasi ö mueno'e jö göho majëhi'ie'ö. Èjöho bogo nu huè'e jöho jio'i ma-sanu'e jöemuje. Aehu jemesirire mu börömo vaeromo Badare ihore jemë muebejëvoromo jögoru majëhijarue è aribövioho jemëro mae uehorovëvore. <sup>13</sup> Mae uehorovëvoromo jabesi muoho uehorovoromo rajëhi avohore. Röhu iro muorovo'o'ho nadi vae'i ma-raromore.

<sup>14</sup> Röhu nasi ö mueno'e ave muohu'o vaere. Mu bijöni'e aribövioho uëvego mue vaej'ë'le raromo'i. O juhuoni'e aribövioho ajëmego dë vövöbajo'o'ho mae jëvo'iro. O darugo u'uhëv'ë'e aribövioho ajëmego biririvëvo'i. Ae aho'obëhe jabesi öroro ma-sanu'e jöhemu majëhire. <sup>15</sup> Avoho mueberovore. Aehu mu sisë vaejëv'ë'o'ho nadi mana mu sisèho vaere. A'i ae göëro göho huè baerovo'i o a ioro'iorohu'o huè baejëvo'i è'o gare.

<sup>16</sup> O vae majae nimorohonövore. <sup>17</sup> God-are öroro jöe majahiemu majahinövore. <sup>18</sup> Mu diehi

rovë'oho hesi öroro huë mae uanövore rabëni Iesu Keriso-are aribövioho jemëro muoho ëhi vaejëro God-ro nimë'e jiaje.

<sup>19</sup> God-are Aru'ahoho vëninö'e ravajoho nadi duohore. <sup>20</sup> He'irarije aëro uëvego: God-are Aru'ahëro jöho bojemi'ego majëhijajë uëvamu hejë'oho nadi bijönimore. <sup>21</sup> Nadi bijönimo'i a'i jöho jemesi simanëro mevoromo gare diho mae jiego diho sisë jiego. O mue aho'o ëhi mevo gare. Mae jiamu gavë'iroho avoho ma'enore. <sup>22</sup> Sisë jiamu gavë'iroho aho'o vuonugore.

<sup>23</sup> Röhu God hu ajamuego huë mae raro-marue ahoje. Ëhuni na nege huro ajëmego jemëro uehore aho'obëhe ma-maëremu hesi örire gemu bojami'irarijego. Göho na nege God-ro jemesi aru'ahe dë vövöbajo'e sino haho'e aho'obëhe muebejëvobe va'ojöro ëhuro nosi Bada Iesu Keriso rovë'iroho jemë jö sisëho bogojëvo'i ma-maemu jëvo'iröhego. <sup>24</sup> Iae huro ëhi ajëmi'ë'e rabëni jemë hesinö rinëgade aho God hu nue gemu uehorovaje aëro jië'ëro.

<sup>25</sup> Nasi ö mueno'e jemëro nosi jöëni ëhu'o parie vaenövore.

<sup>26</sup> Christian aganehu jejamirovaruëhi aho'obëhe ëhi jejamirovore. <sup>27</sup> Röhu Paul naro Badare ihore ave jöho darugo'o majëhiromo uëve. Ave naehu jajivode jöho adahego Christian aganoho aho'o heruomo'i.

<sup>28</sup> Nosi Bada Iesu Kerisoro huë baeromo jemë ajëminövo'ë'e. Ahia mino'e.

**God-are Jögoru I'oho**  
**The New Testament in the Omie language of Papua**  
**New Guinea**  
**Nupela Testamen long tokples Omie long Niugini**

copyright © 1991 Wycliffe Bible Translators, Inc.

Language: Ömie (Omie)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 21 Feb 2024 from source files dated 31 Aug 2023

a68769b4-6180-5825-a17e-676d8f6a7efa